

# ARRÜNA SEGUNDO ÑACONOMOSORRTI SAN PEDRO

**1** <sup>1</sup>Arrüñü Simón Pedro yaserebiquia ümoti Jesucristo y apóstol ñü ümoti. Rraconomoca tanu ümo namanaiña bama yasutiuma arrüna urria manunecatarrü y icocotama tacana arrüsomü. Torrio oemo arrüna manunecatarrü itopiqui buenurrti Jesucristo naqui Tuparrü oemo, naqui uiche utaesübuca eanaqui nomünantü.

<sup>2</sup>Rreanca autacu ümoti Bae Tuparrü, nauqui manrrü puerurrü apisuputarti, y arrtito Señor Jesús. Auqui caüma urria nabaca uimia y icunusüancanama año.

## Utacümanauncuca uiti Tuparrü

<sup>3</sup>Usuputacati Señor, naqui itasuruti oñü, nauqui atusi au nosüboriqui arrüna tarucu nicusüurrti y nanentacarrti. Sane nauquiche tütorrio oemo uiti nanaiña ñacunusüancacarrti, nauqui puerurrü uña urria nosüboriqui, y nauqui puerurrü macoconaun ümoti. <sup>4</sup>Sane itorrimiatati oemo nurarrti tacana macumanatarrrü arrüna tarucu nicuarrrü. Uirri puerurrü utaesübu eanaqui arriüba chomirriampi nurriantümo icu na cürri. Iyebo osoi caüma tacana nacarrti. <sup>5</sup>Chauqui tapicocota arrüna urria manunecatarrü. Pero tiene que apiña nurria, nauqui uirri apisamune arrüna urria, y auqui caüma urria napapanauncu. <sup>6</sup>Y auqui apiüaca apitochenaca arrüna naurrianca ñome aruqui nanaiñantai. Y auqui apiüaca apasamu tairri ñome ba taquisürücüca. Y auqui tiene que apiüaca apacoconaun ümoti Tuparrü. <sup>7</sup>Auquimanu caüma cuasürüma aume bama aubaruquitaiqui au nürirrti Jesús, y au nitacürurrü cuasürüma aume namanaiña macirrtianuca. <sup>8</sup>Arrtü manrrü apisamute arrüna sane, manrrü apisuputacati Señor Jesucristo, y manrrü urria nausüboriqui. <sup>9</sup>Tapü arrti naqui chisamutentipü sane, es tacana naqui chasaratitüpü nurria. Chisuputaratitipü Cristo. Canapae tütacürusu ñaquioncorrti iyo arrüna tümorrmiacana tato nomünantü uiti tücañe.

<sup>10</sup>Tapü arrañ, masaruquitaiqui, autacümanauncuca uiti Tuparrü, y itasuruti año. Sane nauquiche apiña nurria aübu narucurrü aume au

nausüboriqui urria. Arrtü apisamute sane, chapinococatipü Tuparrü. Tapü ane penarrü aboi. <sup>11</sup>Auqui caüma chücuerrtarrüpi aye aboi auna cauta üriabucati Señor Jesucristo, naqui uiche utaesübuca eanaqui nomünantü. Yasuriuruti año aübu urria. Arrümanu nüriacarrti champü nitacürürü.

<sup>12</sup>Sane nauquiche suraboiraiqui arrüna sane ausucarü, tapü tacürusu napaquionco, panaca chauqui tütusio nurria aume arrüna ñemanauntu manunecatarrü, arrüna urapoimia tücañe ausucarü. <sup>13</sup>Pero canapae urriantai yasiquia suraboi ausucarü mientras isüboriquiaiqui auna icu na cürri, sane tapü tacürusu napaquionco. <sup>14</sup>Itopiqui tusio ñemo que contoatai tiene que ñoco arrüna nisüboriqui icu na cürri. Ta sane urapoiticaü Señor Jesucristo isucarüñü. <sup>15</sup>Sane nauquiche yapacheca niqubunü, nauqui apaquionaño ñome arrüba sane, arrtü tisonca.

### **Arrübama arrtaimia nanentacarrti Cristo tücañe**

<sup>16</sup>Arrüsomü apostolerrü suburapoi ausucarü aucutanu arrüna niyequirrti Señor Jesucristo aübu tarucu nüriacarrti. ¿Auquiche sopipiane? ¿Taqui auqui ba cuentuca, arrüba urapoimia bama ipiacama nurria uraboi? No, champü. Tapitacuta arrüsomüantoe sumarrtai arrümanu nanentacarrti Bae Tuparrü itupecuti Jesús, <sup>17</sup>numo urapoiti Tuparrü naqui Yäütoti arrüna ñanauncurrti ümoti. Sane te, arrti yarusürürü Tuparrü nanti sane: “Tonenti naqui Isaiü, tarucu nicuarrti ñemo. Ipuçünunca nurria icuatati”.

<sup>18</sup>Arrüsomü somoncoi arrüna sane ñanitacarrti Tuparrü auqui napese, numo amonco somü ichepeti Jesús onü manu yiriturrü samamecana.

<sup>19</sup>Sane nauquiche manrrü sopicocota ñanunecacarrüma bama profetarri tücañe. Arraño urria arrtü apicocota nurria, itopiqui arrümanu nurarrüma tacana basarurrü aume eana tomiquianene cheperrtü tütaneneca. Arrti Cristo anati au nabausasü tacana nocoborese, arrüna cuara. <sup>20</sup>Tapü tacürusu napaquionco iyo arrüna sane: Champüti naqui puerurrü atusi ümoti uirrtiatoe isane nümoche manio manunecataca icu Nicororrü. (Solamenterrü ui yayuracarrti Espiritu Santo puerurrü atusi oemo.) <sup>21</sup>Itopiqui arrübama profetarri champürrtü manitanama auqui noñemarrümantoe. Ta cuati Espiritu Santo au nasasürüma. Uiti caüma torrio urapoboiboma.

### **Arrübama manunecana mapancarrü**

**2** <sup>1</sup>Pero aboma ito tücañe bama profetarri mañapanca eana bama israelitarri, bama manunecana arrüna churriampü. Sane ito aboma ñana abarrüpecu bama manunecanama mapancaca, arrüba uiche amameso ñapanauncurrüma macrirrtianuca. Hasta urapoimia que chisuputaramatipü Señor, naqui coiñoti itopiquimia. Itobo arrüna churriampatai niyachücoimia cuatü ñana carrticurrü ümoma, tarucapae y rrepenteatai, tabücomantai uirri. <sup>2</sup>Pero aboma ñana sürümanama bama isamutema isiu manu churriampatai niyachücoimia. Auqui nacarrüma caüma manitanama churriampü macrirrtianuca icütüpü arrüna

ñemanauntu manunecatarrü osoi. <sup>3</sup>Arrüibama mañapanca tarucu nirrancarrüma iyo monirri. Urapoimia ausucartü arrüiba cuentuca auquimiantoe, abu iyo naumoni. Pero arrti Tuparrü tücoboï chauqui nicoborirrti, nauqui acurratati aüibuma. Contatai bacheboti fuerte nurria carrticurrü ümoma.

<sup>4</sup>Aboma tücañe arrüibama angelerrü isamutema nomünantü. Arrüma ito carrticaboma uiti Tuparrü. Penecoma au infierno. Acamanu aboma au preso eana tomiquianene, yarrüperacarrüma ümo manu nanenese nesa bacurrtacarrü.

<sup>5</sup>Isiatai pasabo tücañe icu na cürrü au nitiemporrü Noé. Carrticabo manu genterrü isamute nomünantü. Ubacarama eana manu champü tacanache nisubaiqui turrü. Ochoatai macrirrtianuca taesüburuma ñünana manu turrü. Arrti Noé ichepe bama siete nesarrti familiarrü. Abu arrti Noé tücañe urapoiti isucartü genterrü causane nauqui urria nisüboriquirrimia au narrtarrti Tuparrü.

<sup>6</sup>Arrti Tuparrü bachebotito carrticurrü ñome manio torrü puebluca Sodoma y Gomorra. Omomo uiti, omoncono niyotübütürrtai. Ui arrüna sane barrtai causane uiti Tuparrü ümo namanaiña bama isamutema nomünantü. <sup>7</sup>Tamantiatai ñonünrrü taesüburuti auqui manio puebluca, arrti Lot. Arrti urria nisüboriquirrti au narrtarrti Tuparrü. Tarucu nitaquisürücürri ui manu tarucu nomünantü ui bama pohoso. <sup>8</sup>Naneneca arrtai y oncoiti arrümanu nomünantü uimia.

Orronene ümoti. <sup>9</sup>Así que arrti Tuparrü ipiacati nurria ataesümunucuti eanaqui taquisürücürri ümo bama ñanaunumati. Tapü namanaiña bama isamutema nomünantü cuatü ümoma carrticurrü au manu nanenese nesa bacurrtacarrü.

<sup>10</sup>Arrüna manrrü fuerte carrticurrü sürotü ümo bama tarucu nirrancarrüma avivimia tacana numuquianca, y ümo bama chirranrrüpiüma acoconauma ümo nüriacarrü. Arrübama manunecanama mapancarrü ñentonaunrrüma y vanurrüma. Chübirrubupüma anitama churriampü ümo bama mayarusürüca au napese, bama ane nüriacarrüma. <sup>11</sup>Ni arrübamapü angelerrü anitama churriampü ümo bama mayarusürüca au napese isucarüti Tuparrü, abu arrübama angelerrü manrrü nüriacarrüma pünanaqui bama mañapanca. <sup>12</sup>Pero arrüma chipiacapüma apensama urria, nacarrüma tacana numuquianca naurri nüunrrü, arrüba abe icu cürrü, omeno nauqui autabori. Arrübama mañoñünca churriampü ñanitacarrüma ümo arrüna sane, chentienterrüpiüma. Sane nauquiche taborioma ito ñana tacana numuquianca. <sup>13</sup>Tone caüma bapacatarrü ümoma itobo arrüna nomünantü uimia. Itopiqui urriantai ümoma asamuma pierrta, chanecanapatai uimia arrüna isamutema, hasta au sapese isamutema arrüna chomirriampü. Arrtü aubaca chépe año, basoma ito auchepe, pero ümo cüsocorrtaï nacarrüma auchepe. Encañaoma aume, itopiqui mapañama anauma ümoti Señor. <sup>14</sup>Arrtü arrtaimia paürrü tirranrrüma ümo. Tarucu nirrancarrüma aisamunema nomünantü. Matachemacanama ümo bama chipiacapü aicocoromati nurria Jesús. Tarucu nirrancarrüma ümo monirri. Chauqui tüsegurorrü carrticurrü ümoma. <sup>15</sup>Aboma tacanarrtü ensoroma auqui na besüro cutubiurrü. Isamutema isiu tacana arrüna isamutenti Balaam, aütorrti Beor tücañe, itopiqui arrti maniqui Balaam rranrrti aisamunenti nomünantü itobo monirri, abu profetarrti. <sup>16</sup>Pero cuasoti itopiqui

manu nünantü uiti. Arrüba numuquianca chiüpuerurripü apanita, pero au manu tiemporrü manitana niyaburrtü bururrtü ümoti tacana ñanitacarrti ñoñünrrü. Uirri caüma chiüpuerurriquipü aisamunenti manu nomünantü maniqui profetarrü.

<sup>17</sup>Ichepecacama bama mañoñünca tacana nantaituca, abu cüpiro turrtü ubauqui. Ichepecacama ito tacana cüsaüboca bopeoro ui maquiütürü, abu champü tarrü oboi. Chauqui tacomorabo ümoma uiti Tuparrü auna cauta manrrü tomiquianene. <sup>18</sup>Arrüma manitanama aübu nivianucurrüma, abu manitanamantai. Ui arrüna yaviviquirrimia isiu nirrancarrüma y arrüna nisonirrimia matachemacanama ümo bama aübo taesüburuma eanaqui nomünantü. <sup>19</sup>“Tapü mosorrü año ümo nüriacrrü”, namatü ümoma. Abu arrümantoe aboma tacana mosorrüma ümo nomünantü. Itopiqui usaca tacana mosorrü oñü ümo arrüna ümoche baserebiquia. Y arrüma baserebioma ümo nomünantü. <sup>20</sup>Arrübama batachebo uimia tisuputaramati pario Señor Jesucristo tücañe, naqui uiche taesüburuma baeta eanaqui nomünantü icu na cürü. Itopiqui ui nomünantü mameso nistüboriquirrimia bama icu na cürü. Auqui caüma ichübomacü tatito ümo nomünantü, bataheboma uirri. Sane nauquiche caüma manrrü churriampü nacarrüma pünanaqui tücañe. <sup>21</sup>Manrrü urriampü ümoma arrtüpü choncoipüma arrüna manitacarrü causane nauqui urria nusaca aübuti Tuparrü. Pero arrüma oncoimia tücañe y icocotama baeta. Auqui ñoconiomia tatito arrüba mosamamecana yacüpucurrti Tuparrü ümoma. <sup>22</sup>Pasabo uimia tacana arrüna manitacarrü sane: “Arrümanu tamocorrü uünasio, y ññate tatito nuünasiturrtü”. Ane ito arrümanu quiatarrü manitacarrü, ta ümoma ito: “Nupauchese, arrtü tuitopiancata, besüro uirri tatito eana taurrtü”.

### Niyequirrti tato Señor

**3** <sup>1</sup>Bueno bama masaruquитайqui, ui arrüna tütabe torrtü nirraconomoso aume. Iconomoquio nauqui icuansomoconaño, nauqui urria napapensaca. <sup>2</sup>Irranca nauqui apaquionsaño iyo nura bama profetarrü tücañe, bama manitanama uiti Tuparrü. Apaquionsaño ito iyo nura bama apostolerrü, bama urapويمia ausucarü yacüpucurrti Señor, naqui uiche utaesübuca eanaqui nomünantü.

<sup>3</sup>Pero apipiase arrüna sane: Arrtü tüsaimia ñapacümuncuturrti Tuparrü cuamatü bama macrirrtianuca bavivicoma isiu nirrancarrüma ñome ba chomirriampü. Arrüma unuma año, <sup>4</sup>y namatü aume sane: “Así que arrti maniqui Jesús cuati tato, saon. ¿Cautamo nacarrti? ¡Quiubupü ayeti tato! Chauqui tücoiñoma bama uyaütaiqui, y nanaiña anancaiquitatai auqui numo aübo urriane na cürü”. <sup>5</sup>Arrüma ui noñemarrümantoe tacürusu ñaquiioncorrüma iyo arrüna isamutenti Tuparrü napese y cürü ui nurarrtiatai. Urriante cürü eanaqui turrtü, y ananca onü turrtü. <sup>6</sup>Arrümanu cürü tücañe iñarrio ui turrtü, numo cuatü manu yarusürürü turrtü au nitiemporrü Noé. <sup>7</sup>Arrümanu cürü y napese caüma abequi, chomiñarrioquipü itopiqui sane nurarrti Tuparrü. Pero au manu nanenese ensümunu ñana bacurrtarati

Tuparrü aübu bama chümacoconaurrüpüma ümoti. Bacheboti carrticurrü ümoma. Au manu nanenese omiñarrio ito na cürrü y napese ui pese.

<sup>8</sup>Masaruquитайqui, bama cuasürü iñemo, apipiase arrüna sane: Arrti Tuparrü quiatarrü naca niñameriracarrti. Itopiqui taman sapese es tacana mil añoca ümoti, y mil añoca tacana tamantai sapese ümoti. <sup>9</sup>Aboma bama ñaquiioncorrüma que arrti Tuparrü tacürusu ñaquiioncorrti, nauqui cumpliboti aübu bacurrta carrti y carrticurrü, itopiqui masamuñati abaübu, itopiqui chirranrrtipü nauqui anati naqui sürotü au infierno. Rranrrti nauqui namanaiña puerurrü aiñorronconomacü.

<sup>10</sup>Pero arrümanu nanenese ensümunu uiti Señor cuatü rrepenteatai tacanati taman cusüpürrü au tobirri. Au manu nanenese iñarrio napese aübu tarucu nisiürrü. Nanaiña arrüba abe obüro eana nonco pese. Enterurrü na cürrü aübu nanaiña arrüba abe icu omiñarrio, champü isane sobürau. <sup>11</sup>Sane te ñana, masaruquитайqui, nanaiña iñarrio. Sane nauquiche arraño tiene que apiña nurria nausüboriqui, apitorrimiasaño ümoti Tuparrü, nauqui apisamune isiu nirrancarrti, <sup>12</sup>naparrüperaca cümenu manu nanenese. Apiña nurria, sane nauqui contoatai aiñanai manu nanenese auqui ñana omo napese y nanaiña iñarrio eana noncorrü. <sup>13</sup>Itopiqui arrti Tuparrü turapoiticaü usucarü que rranrrti aisamunenti nuevurrü napese y nuevurrü cürrü oemo. Acamanu champü nomünantü, nanaiña urria. Arrümanu sane tone arrüna ümoche nubarrüperaca.

<sup>14</sup>Sane nauquiche, masaruquитайqui, bama cuasürü iñemo, apiña nurria, tapü ane nomünantü au nausüboriqui, nauqui urria nabaca aübuti quiatarrü y nauqui urria nabaca au narrtarrrti Tuparrü, mientras aparrüperaca ümo manu nanenese ensümunu. <sup>15</sup>Ui arrüna masamuñati Señor manrrü puerurrü autaesübu eanaqui nomünantü. Sane ito maconomonoti usaruqui Pablo aume. Arrti Tuparrü itorrimiatati ümoti urriampae ñapanauncubuti. <sup>16</sup>Sane ito urapoiti au manio ñaonomosorrrti, numo manitanati icütüpü niyequirrrti tato Cristo. Pero au manu ñaonomosorrrti ane ito arrüna cuestarrü aye osoi. Aboma bama macrirrtianuca bavivicoma isiu nirrancarrümantoe, y chütusiopü ümoma. Arrüma campiabo uimia arrüna urapoiti Pablo, y sane ito uimia aübu manio piquiataca libruca au arrüna samamecana Nicororrü. Ui arrüna sane uimia cuatü carrticurrü ümoma.

<sup>17</sup>Pero arraño, masaruquитайqui, chauqui tütusio aume. Amasasai nurria, tapü apatacheca ui bama isamutema nomünantü isiu nirrancarrümantoe. Tapü ameca tato eana nomünantü, itopiqu turria nabaca. <sup>18</sup>Tari manrrü apasutiu nigraciarrti Señor Jesucristo, naqui uiche utaesübuca eanaqui nomünantü. Tari manrrü apisuputacati. Ümoti te numanauncu caüma y ümo para siemprrü. Amén.